

## ANDAM KA NA BA?

Kadaghanan sa mga tawo karong panahona nakahibalo nga ang kalibutan hapit na matapos apan kadaghanan kanila wala makahibalo nga kinahanglan mangandam sila sa dili pa matapos ang panahon. Kadaghanan sa mga tawo karon wala gitudluan mahitungod sa mga panginahanglan sa Dios alang sa iyang katawhan sa dili pa sila makasulod sa langit ug sa pagkadawat sa kinabuhiing walay-katapusan. Ang atong pakigbugno paingon sa langit espirituwal ug sa dili pa ang usa ka tawo makasabot sa mga espirituhanong butang, kinahanglan pagalimpyuhan usa niya ang iyang lawas nga mao ang templo diin magapuyo ang Balaang Espiritu (**1 Cor 6:19**). Kon magabutang kita dinhi sa atong lawas sa bisan unsa nga dili makahatag sa maayong panglawas o kon dili kita magsunod sa balaod sa maayong panglawas nga naglangkob sa preskong hangin, limpyong tubig, dan-ag sa adlaw, ehersisyo, insaktong pahulay, pagsalig sa Dios, pagpugong sa kaugalingon, mangitngitan ang atong mga hunahuna ug dili na kita makahimo sa pagsabot sa mga espirituhanong butang.

Nag-ingon ang Dios pinaagi kang profeta Jeremias nga kinahanglan mangita kita sa karaang dalan nga gitawag nga maayong dalan, ug lumakaw kita niini (**Jer 6:16**) ug sa paglalang sa Dios sa tawo, gihatag Niya ngadto kanila ang orihinal ug ang pinakamaayo nga pagkaon (**Gen 1:29**). Kini nga pagkaon wala maglangkob sa unod sa mga patayng mananap. Ug tungod niini, si Adan ug ang iyang mga anak nabuhi sulod sa 700-900 ka mga tuig (**Gen 5**). Apan sa human sa lunop sa kaadlawan ni Noe, iyang gitugotan nga ang tawo mukaon sa unod sa mananap ubos sa mga balaod nga gihatag Niya sama sa atong makita sa **Leviticu 11**. Ug tungod niining gitogot nga matang sa pagkaon, ang edad sa tawo hilabihang niubos ngadto sa 200 ka mga tuig (**Gen 11:31**) ug bisan gani sa 70-80 na lang ka mga tuig (**Sal 90:10**)

Makasusubo, nakalimot ang tawo mahitungod sa orihinal nga pagkaon nga gihatag sa Dios didto sa tanaman sa Eden ug mas makasusubo pa gayud, ang mga magwawali karong panahona wala magtudlo sa mga tawo mahitungod sa karaang dalan tungod kay sila hilabihang nasako sa pagwali mahitungod sa pagpadaghan sa salapi diin ang mga tawo nagtoo nga mahimong sila magboot sa ilang buhaton ug sa gihapon makaadto sila sa langit. Nailad usab ang mga tawo pinaagi sa mini nga mga magtutudlo nga nanag-ingon “bisan unsay magasulod sa tawo gikan sa gawas dili makapahugaw kaniya.” (**Mar 7:18**) Nagtoo sila nga dili sala ang pagkaon sa bisan unsang unod sa mananap bisan human gideklara sa Dios nga mahugaw kini. Gigamit nila ang **Markos 7:18** aron sa pagpalusot sa ilang pagtoo bisan kini nga bersikulo wala maghisgot mahitungod sa pagkaon sa mahugawng mananap apan naghisgot kini nga ang pagkaon nga walay-panghunaw (**Mar 7:2**) dili makahugaw (makapahimong makasasala) sa usa ka tawo.

Dugang usab, adunay laing mini nga pagtulun-an nga mahimong mukaon ikaw sa bisan unsang mananap tungod kay si Pedro diha sa iyang pananawon gisultihan sa Dios sa pag-ihaw ug sa pagkaon (**Buh 10:13**) Kini nga bersikulo sa pagkatinood wala gayud maghisgot mahitungod sa pagkaon sa mahugawng mananap apan kini naghisgot mahitungod sa mga Hudiyo ug mga Hentil nga nahiusa diha kang Kristo pinaagi sa krus (**Buh 10:34-35; Efe 2:15-29**) Nagpakamatay si Kristo alang sa tanan ug dili nato tawgon si bisan kinsa nga tawo nga mahugaw tungod kay ang Dios walay pinalabi sa tawo.

Apan adunay pipila sa mga salin nga katawhan sa Dios nga nagtamod sa karaan nga dalan ug nagtudlo sa mga tawo sa paglakaw niini. Ug kon ang

Dios walay balaod sa panglawas alang sa iyang katawhan ug kon gitogot Niya nga kaon ang tanang unod sa mananap, nan nganong ang kalibutan karon puno sa masakiton ug sa himalatoy? Busa, kon boot nga kita makabaton sa maayong panglawas aron kita makasabot sa mga espirituhanong butang, kinahanglan magreporma kita ug limpyuhan nato ang atong lawas pinaagi sa pagsunod sa balaod sa Dios alang sa maayong panglawas nga naglangkob sa preskong hangin, limpyong tubig, dan-ag sa adlaw, ehersisyo, insaktong pahulay, pagsalig sa Dios, pagpugong sa kaugalingon ug sa pagkaon sa orihinal nga pagkaon nga gihatag sa Dios ngadto sa tawo sukad sa sinugdan. (**Gen 1:29**) (**1 Juan 1:2**)

Makita nato sa bisan asang dapita ang mga ilhanan sa kapanahonan ug daghan ang gitudloan nga ang buhaton sa usa ka tawo mao lamang ang pagtoo ug pagdawat kang Kristo ug mahimo na nga siya makasulod ngadto sa langit. Tinood ba kini? Dili gayud. Ang kamatuoran mao nga si “Si Abraham mitoo sa Dios, ug kini giisip kaniya nga maoy pagkamatarung”; ug siya ginganlan nga higala sa Dios.” (**Jac 2:23**) Ug si Apostol Pablo nag-ingon, “Busa inyong makita nga ang mga tawo nga adunay pagtoo mao ang mga anak ni Abraham.” **Gal 3:7**. Apan ang pagtoo ni Abraham gipadayag pinaagi sa iyang mga binuhatan. (**Jac 2:21, 22; Gen 26:5**) Ug kon kita mga anak ni Abraham nan magpakita usab kita’g pagkamatinumanon sama kang Abraham. (**Juan 8:39**)

Si disipulo Juan, nga nabuhi nga hingpit diha sa gugma, nagsulti kanato, “Kay ang paghigugma alang sa Dios mao kini, nga pagabantayan ta ang iyang mga sugo.” **1 Juan 5:3**. Kining gitawag nga pagtoo ni Jesu-Kristo nga nag-angkon nga nagpalingkawas sa mga tawo gikan sa ilang obligasyon sa pagtuman sa Dios kini dili pagtoo, apan usa ka panaghap. “Kay tungod sa grasya kamo nangaluwasa pinaagi sa pagtoo” **Efe 2:8**. Apan ang “pagtoo patay kon kini walay binuhatan.” (**Jac 2:17**) Tinood nga kita ubos sa grasya apan **Roma 6:15-16** “Nan, unsa man? Magpakasala ba kita kay dili man kita ilalum sa kasugoan kondili ilalum sa grasya? Palayo kana! Wala ba kamo masayud nga kon itugyan ninyo ang inyong kaugalingon ingon nga mga masinugtanong ulipon ngadto kang bisan kinsa, kamo mga ulipon niya nga inyong ginasugot, mga ulipon nga iya sa sala nga nagahatud ngadto sa kamatayan, o iya sa pagkamasinugtanon nga nagahatud ngadto sa pagkamatarung?” Ang krus ni Kristo wala naghatag kanato sa libre nga pagtogot sa pagpadayon diha sa pagpakasala (paglapas sa sugo sa Dios – **1 Juan 3:4**) apan naghatag kini kanato sa higayon sa paghinolsol ug sa pagtalikod gikan sa atong mga sala. Kini mao ang grasya sa Dios alang sa tawo diin kita nakabaton sa higayon alang sa paghinolsol. Si Jesus mismo misulti sa wala pa Siya mianhi dinhi sa yuta, “Nagkalipay ako sa pagbuhat sa imong kabubut-on, Oh Dios ko; Oo, ang imong Kasugoan ania sa sulod sa akong kasingkasing.” (**Sal 40:8**). Ug human gayud sa iyang pagkayab pag-usab ngadto sa langit, Siya miingon, “Gituman ko ang mga sugo sa akong Amahan ug nagapabilin ako diha sa iyang gugma.” (**Juan 15:10**). Ang Kasulatan yano nga nag-ingon, “Ug atong mahibaloan nga kita nakaila kaniya pinaagi niini: kon kita nagabantay sa iyang mga sugo.” (**1 Juan 2:3**). Busa, ang pagtoo ug ang binuhatan (bunga sa pagkamatinumanon ngadto sa kasuguan sa Dios) nagkauyonay ug kini mao ang tinood nga pagkamatarung. (**Rom 2:13; Jac 1:22**)

Ang kondisyon sa kinabuhing walay-katapusan nagpabilin sa mao ra gihapon, sama nga mao kini didto sa tanaman sa Eden sa wala pa ang pagkahulog sa atong unang ginikanan diin kini mao ang hingpit nga pagtuman ngadto sa kasuguan sa Dios, hingpit nga pagkamatarung. Kon ang kinabuhing walay-katapusan gitanyag pa sa lain nga kondisyon gawas

niini, nan ang kalipay sa tibuk uniberso mapapeligro. Ang sala dili makaplagan didto sa langit. Si Satanas gipagawas gikan sa langit tungod sa paglapas sa sugo sa Dios ug sa wala paghinolsol gikan niini. Ang sala usa ka balatian, kini usa ka sakit nga makahimo sa pagpatay kanato gawas kon kita motuaw ngadto sa Dios alang sa paghinolsol, sa pagbiya gikan sa sala ug sa paghatag sa atong kinabuhi ngadto sa Dios. (**Eze 14:6; Juan 8:11; Buh 26:20**) Ug hinumdumi, hukman kita sa Dios DILI sumala sa atong PAGTOO kondili sumala sa atong **BINUHATAN**. Busa, bisan kapila kita moangkon sa pagtoo sa Dios, kon kita malinapason, ang atong pagtoo dili makatabon sa atong pagkamasupilon (sala). (**Eze 3:20**)



Ang sugo sa Dios nahimong salamin alang sa atong kinabuhi diin kon atong diritso nga tanawon ang Napulo ka Sugo makadiskobre kita sa pagkahiwi sa atong kinaiya. Kini nagpakita kanato nga kita anaa sa sala, ug “ang bayad sa sala mao ang kamatayan.”

**Rom 6:23**. Kadtong naligotgot batok sa sala mupadayag sa dili-mausab nga hingpit nga kinaiya sa atong Ginoo. **Mal 3:6**. Ang Napulo ka Sugo mao ang larawan sa Dios, kini mao ang iyang kinaiya sa gugma nga kinahanglan atong ipadayag ug paningkamutan sama sa gisulti sa **2 Tim 3:17**. Ang Dios gugma ug ang iyang sugo nagpadayag niini nganhi kanato. (**Mat 22:37-40**) Si Jesus misulti diha sa **Juan 14:15**, “Kon nahigugma kamo kanako, inyong pagtumanon ang akong mga sugo” ug “kon gusto kang mosulod sa kinabuhi, bantayi ang mga sugo.” **Mat 19:17**. Sa pagtan-aw diha sa kasuguan makita nato nga ang unang upat ka sugo nagtudlo kanato unsaon sa paghigugma sa Dios (**Exo 20:3-11**) ug ang katapusang unom nagtudlo kanato unsaon sa paghigugma sa atong isgkatawo. **Exo 20:12-17**.

Adunay usa ka sugo sa Dios nga nalimtan sa tawo tungod sa mga bakakong magtutudlo. Importanteng kaayo ang ikaupt nga sugo sanglit kini nagtawag nga simbahan nato ang Magbubuhay diha sa iyang pinili nga Adlawng Igpapahulay sa ikapitong adlaw sa semana nga iyang gipahulayan, gibalaan ug gipanalanginan (**Gen 2:2-3**). Daghan ang nag-angkon nga sila adunay gahum sa pag-usab sa Adlawng Igpapahulay sa Ginoo nga gipanalanginan Niya apan sa sinugdan hangtud sa katapusan sa Kasulatan walay bisan usa ka mando sa Dios sa pagtahud sa lain nga adlaw gawas nianang iya nang gipili. Ang Vatican mismo miangkong,

“**Ang Domingo usa ka katukuran sa Katoliko** ug ang iyang angkon sa pagbantay niini madepensahan lamang pinaagi sa mga prinsipyo sa Katoliko... Sugod sa sinugdanan ngadto sa katapusan sa Kasulatan **walay bisan usa nga pasaha** nga nagtugot sa pagbalhin sa senimanang publiko nga pagsimba sa katapusang adlaw sa semana ngadto sa unang adlaw.” (*Catholic Press, Sydney, Australia, August, 1900.*)

Ang Domingo maoy usa ka adlaw diin naghatag sila sa pagtahud dili ngadto sa Dios apan ngadto sa Papa sa Roma.

“**Kini mao ang Iglesya Katoliko pinaagi sa gahum ni Jesu Cristo, ang nagbalhin niining pahulay ngadto sa Domingo isip paghandum sa pagkabanhaw sa Ginoo.** Busa ang pagbantay sa Domingo sa mga **Protestante maoy usa ka pagtahud nga ilang gihatag, bisan pa sa ilang kaugalingon, ngadto sa gahum sa iglesya Katoliko.**” *Mgr, Segur Plain Talk about Protestantism of today page 213*

Aduna ba makahimo sa pag-usab sa Adlawng Igpapahulay sa Ginoo nga iyang gipanalanginan? “Ania karon, ako nakadawat ug sugo sa

pagpanalangin: Ug siya nagpanalangin, ug ako dili makausab niana." **Num 23:20**

Atong makita sa Pinadayag 14 ang walay-katapusang mensahe nga igamantala ngadto sa tibook kanasuran. "Kahadloki ninyo ang Dios ug kaniya ihatag ninyo ang himaya, kay nahiaabut na ang takna sa iyang paghukom; ug simbaha ninyo siya nga maoy nagbuhat sa langit ug sa yuta, sa dagat ug sa mga tuburan sa tubig." (**Pin 14:7**) Unsa ang pagkahadlok sa Dios? "Kahadloki ang Dios, ug bantayi ang iyang mga sugo; kay kini mao ang tibook nga *katungdanan* sa tawo. Kay pagadad-on sa Dios ang tagsatagsa ka buhat ngadto sa paghukom uban ang tagsatagsa ka tinago nga butang, bisan ang maayo, kun bisan ang dautan." (**Ecc 12:13-14**) Ug kon simbahan nato ang Matood nga Magbubuhat, kita magsimba ug magbalaan sa Iyang Adlawng Igpapahulay diha sa ikapitong adlaw sa semana. Niining adlaw, dili kita magatrabaho apan gamiton nato kining adlaw (pagsalop sa Biernes ngadto sa pagsalop sa Sabado **-Lev 23:32**) aron sa pagtahud ug sa pagpasalamat ngadto sa Amahan, Anak ug Espiritu Santo ug sa pagsimba Kanila diha sa Espiritu ug sa Kamatuoran. **Juan 4:24**. Muhunong kita sa pagpamalit o sa pagpamaligya (**Neh 10:31**), mag-andam sa atong pagkaon sa Biernes, adlawng tigpangandam (**Exo 16:23; Luk 23:54**), pag-ayo/pagtabang sa mga masakiton (Markos 3:2) ug "walay pagbuhat sa imong kaugalingon nga mga paagi, ni mangita sa imong kaugalingon nga kalipayan, ni magasulti sa imong kaugalingon nga mga pulong. (**Isa 58:13**)

Kadtong musalikway niini nga mensahe mahulog ngadto sa pag-apostasy = **BABYLON (Pin 14:8)** nga nagpasabot kalibug.

Apan gipasidan-an kita nga sa katapusang mga adlaw adunay pagpanibog gikan sa kamatuoran tungod kay ang kalibutan pinaagi sa lingla mipili sa pagsimba sa Antikristo diha sa kabatok nga adlaw sa pagsimba (**SUNDAY (2 Tes 2:3-4) Dan 7:25** nag-ingon, "ang Antikristo, "magahunahuna sa pag-usab sa mga panahon, ug sa Kasugoan." Tinood ba nga gibuhat kini sa Antikristo?



Ang Papa (Antikristo), ang Mapintas nga Mananap (Roma = **Dan 7:23; Pin13 & 14**), ang Babayeng Bigaon (iglesya Romano Katoliko = **Pin 17**) misulti,

"Pinaagi sa akong diosnong gahum **Akong gipapas ang Adlawng Igpapahulay**, ug nagmando kaninyo sa pagbantay sa unang adlaw sa semana. Ug tanawa, ang tibook sibilisado nga kalibutan miyukbo diha sa talahurong pagkamatinumanon ngadto sa mando sa balaang iglesya Katoliko!" *Father Enright, C.S.S.R. Of the Redemptoral College, Kansas City, History of the Sabbath, p. 802.*

Ang Napulo ka Sugo sa Bibliya nagsumada sa **295 ka pulong**, apan ang napulo ka sugo sa Romano Katoliko nagsumada lamang sa **77 ka pulong**. Kini usa ka dayag nga pagsulay sa pag-usab sa Sugo sa Dios, bisan sa kamatuoran nga si Jesu-Cristo mismo nagdeklara sa **Mat 5:18**, "Kay sa pagkatinuod, sultihan ko kamo, nga samtang magalungtad pa ang langit ug ang yuta, **walay pagasayloan sa kasugoan bisan usa na lang ka kudlit o usa ka tulpok niini**..." Ang iglesya Katoliko nagkuha sa **218 ka kudlit o tulpok** gikan sa Sugo sa Dios sama sa gisulti ni Daniel nga ilang buhaton sa **Daniel 7:25**.

Si Satanas nanlimbong (**Pin. 12:9**) ug nag-andam sa kalibutan aron sa pagdawat sa "Marka sa Mapintas nga Mananap" niining katapusang mga adlaw Unsa ang marka sa mapintas nga mananap? Makita kini sa **Pin.14:9-10,11**.

Una, kinsa man kining mananap (nasud) nga adunay marka? Kini nga nasud gisulti sa **Pin. 13:1-8** nga milutos sa katawhan sa Dios sulod sa 42 ka bulan

42 ka bulan x 30 ka adlaw sa matag bulan = 1260 ka adlaw

Ang 1 ka adlaw sa propesiya 1 ka litral nga tuig (**Eze 4:6**). Kining 1260 ka tuig nga pagpanglutos nahitabo niadtong Dark Ages (538-1798AD). Ang Roma nagpadala ug mga pumapanaw ngadto sa mga nasud aron sa pagpugos sa ilang relihiyon ngadto sa tanang tawo. Ngani niabot kini sa nasud nga Pilipinas pinaagi kang Magellan niadtong 1521 ug ang mga Pilipino miyukbo aron sa pagsimba sa relihiyon sa Roma bisan kini gipugos pinaagi sa kusog. Apan ang Dios dili mamugos sa tawo ni ang Iyang matood nga iglesya mamugos sa tawo sa pagsunod sa Dios.

Busa, ang marka sa mapintas nga mananap mahitungod sa **PAGSIMBA!** Ang Vatican miingon,

"**Ang Domingo** mao ang among **MARKA** sa gahum... ang iglesya labaw sa Bibliya, ug kining pagbalhin sa pagbantay sa Adlawng Igpapahulay maoy usa ka pamatuod niana nga katinuoran." *Catholic Record of London, Ontario, Sept 1, 1923.*

"Sayag lamang nga miangkong ang Iglesya Katoliko nga ang **pagbalhin (Sabado ngadto sa Domingo) maoy iyang gibuhat**... Ug ang paghimo niini maoy usa ka **MARKA** sa iyang iglesyanhong gahum diha sa mga relihiyosong butang." H.F. Thomas, Chancellor of Cardinal Gibbons.

Kinsa sila nga dili mudawat sa Marka sa Mapintas nga Mananap? "Ania niini ang agda alang sa pagkamainantuson sa mga balaan, sa **mga nanagbantay sa mga sugo sa Dios ug sa tinooan ni Jesus.**" **Pin 14:12** Unsaon sa usa ka tawo ang pagkadawat sa marka sa mapintas nga mananap diha sa ilang agtang? Unsa ang anaa sa atong agtang? Ang atong **utok!** Kini mao ang dapit diin kini magahimo sa matugtanon nga pagpili sa pagsimba sa Dios diha sa ikapitong Adlaw sa semana nga mao ang Adlawng Igpapahulay (**Exo 20:8-11**) o diha sa adlaw sa ADLAW (SUN), busa mao ang pagsimba sa Domingo! Unsaon nato pagkadawat sa marka sa mapintas nga mananap diha sa atong kamot? Diha sa propesiya sa Bibliya ang kamot usa ka timaan sa pagpugos kanato batok sa atong kabubut-on aron makahimo kita sa pagtrabaho (**Ecc 9:10**) nga kon kita dili tugotan sa pagtrabaho, kita dili makahimo sa pagpalit ni sa pagpamaligya. **Pin 13:17**. Ang Vatican ba nagplano sa pagpatuman sa mga balaod sa DOMINGO?

"Kini nga organisasyon naglaraw sa tanang posibleng paagi aron sa pagtabang sa pagtipig sa **Domingo isip usa ka sibil nga katukuran**. Ang atong nasudnong seguridad nanginahanglan sa aktibo nga suporta sa tanang maayong lumulupyo aron sa pagkabuhi sa atong Adlawng Igpapahulay nga Amerikanhon. Kinahanglan igapatuman ang mga balaod sa Domingo." *Kinutlo - "principles contained in the Constitution" (then called the American Sabbath Union, The Lord's Day Alliance, Twenty fifth Report (1913), p6.*

Sama sa nahitabo kaniadto, ang Roma sa makausa mopugos sa mga tawo sa pagsimba sa kabatok nga adlawng igpapahulay nga ilang gigahin alang sa pagsimba sa Papa ug dili sa Ginoo diha sa Iyang ikapitong adlaw sa semana nga mao ang silyo sa Dios tali Kaniya ug sa Iyang katawhan (**Eze 20:12, 20**). Apan ang Roma mugamit sa America aron sa pagpatuman sa pagsimba sa Domingo.

Unsa ang mahitabo niadtong mupili sa paglapas sa mga sugo sa Dios ug sa pagsalikway sa Sabado pinaagi sa pagpili sa Domingo kon ipatuman na kini sa balaod? Sila makadawat sa kapungot sa Dios nga mao ang katapusang 7 ka hampak. **Pin 14:10-11; 15:1**

Busa, kon ang pagkamatinumanon ni Adan gisulay pinaagi sa kahoy sa kahibalo, busa mao usab ang pagkamatinumanon sa katawhan sa Dios karong panahona pagasulayan pinaagi sa ikaupat nga sugo aron masuta kon kinsa ang simbahan nila ug kon kinsa ang unongan nila, ang Dios o si Satanas? Walay bisan usa nga hukman hangtud ang kamatuoran muabot ngadto kanila nga ang pagsimba sa Domingo wala gisugo diha sa Pulong sa Dios. Ipatuman unya ang sugo sa pagsimba sa kabatok nga adlawng igpapahulay ug pagasulayan ang tanan kon tumanon ba nila ang Dios o ang tawo (**Buh 5:29**). Kadtong tinuyo nga mupili sa tawo labaw sa Dios makadawat sa marka sa mapintas nga mananap.

Nag-ingon ang Pulong sa Dios nga ilang patyon kadtong dili motuman sa mando sa iglesyang Katoliko diha sa pagsimba sa Papa sa adlawng Domingo. **Pin 20:4**.

Lain usab nga lingla nga gitudlo sa katawhan karon mao nga ang marka sa mapintas nga mananap usa ka "computer chip" nga ilubong diha sa agtang o sa kamot. Kini gibasi nila sa **Pin 13:16**. Ang "computer chip" mismo dili mao ang marka sa mapintas nga mananap kondili kini mahimo nga ilang gamiton aron sa pagpatuman sa "dili makapamalit ni makapamaligya" aron ang uban mosimba sa mananap ug sa iyang larawan.

Mga higala, nagpasidaan kami kaninyo aron kon matuman na kini kamo magpanoo. **Juan 14:29**. Adunay duha ka matang sa katawhan dinhi sa kalibutan, ang mapatuyangon ug malinapason (**Jud 1:4**) nga sa gihapon muangkong nga mitoo sa Ginoo. Ang usa ka matang mao ang mga matinumanon nga katawhan sa Dios. Asa niining duha ka matang sa tawo ang makaadto sa langit? Ang Pulong sa Dios nag-ingon sa **Pin 22:14**, "Bulahan sila nga managlaba sa ilang mga bisti aron makabaton sila sa katungod sa pagpahimulos sa kahoy nga naghatag sa kinabuhi, ug sa pagsulod sa siyudad agi sa mga pultahan." Unsa ang isulti sa Dios niadtong wala maningkamot sa pagtuman sa Iyang mga sugo ug sa pagpakigbugno diha sa maayong bugno labut sa pagtoo (**1 Tim 6:12**)? **Mat 7:23** "Ug unya magaingon ako kanila, 'Wala ko gayud kamo igkaila; pahawa kanako, kamong mga mamumuhat ug dautan."

Hapit na muabot ang pinakadaku nga pagsulay ug kinahanglan mangandam kita. Mamilik ka karon. Dawaton ba nimo ang (silyo) ilhanan sa Dios tali Kaniya ug sa Iyang katawhan? O dawaton ba nimo ang marka sa mapintas nga mananap sa dihang kini ipatuman na sa balaod?

www.RemnantofGod.org  
www.SDRMinistries.org  
Email: [contact@SDRMinistries.org](mailto:contact@SDRMinistries.org)